



Sesida dals

Communitgà ils

Protocol nr.

18 da zercladur 2024

21 da zercladur 2024

535/2024

Dumonda Bundi

concernent mesiras (gallarias) per segirar la via chantunala da Sevgein a Riein

Resposta da la Regenza

La fracziun da Riein en la vischnanca dad Ilanz/Glion è accessibla davent da Glion cun ina via chantunala da 7 km. Tranter auter maina la colliaziun sin ina lunghezza da var 2 km tras in terren stip sut ina tarmenta paraid-crap ora.

Ils eveniments dals onns 2009, 2015 e 2024 èn mintgamai succedids en differents lieus da quest traject da via. Ils puncts neuralgics ch'èn enconuschents fin ussa èn vegnids segirads ils ultims onns dals posts chantunals cumpetents, quai cun gronds sforzs. Tras l'eveniment actual dals 17 d'avrigl 2024 èn questas construcziuns da protecziun vegnidas donnegiadas, resp. per part destruidas.

La determinaziun da las ristgas tras privels da la natira e da la commensurabladad da las mesiras ha lieu sin fundament da reglas e da recumandaziuns ch'èn reconuschidas sin plaun naziunal e chantunal. Ina segirezza cumpletta en connex cun privels da la natira na po betg vegnir garantida en noss chantun cun sia topografia pretensiusa.

Tar la dumonda 1: Las lavurs da rumir la via da colliaziun da Riein èn vegnidas terminadas en il fratemp e la via ha puspè pudì vegnir averta per il traffic suenter 16 dis. Sin basa da las enconuschientschas da la crudada da grippa dals 17 d'avrigl 2024 vegn bainbaud realisada ina nova analisa da las ristgas per il traject da via pertutgà. Sin basa da questa analisa vegnan evaluadas las mesiras necessarias per proteger la via da colliaziun. Las mesiras da protecziun d'enfin ussa èn vegnidas concepidas per in eveniment grond mediocher mintga 30 onns. Sch'i avess da resultar da la nova valitaziun da ristga ina ristga pli auta che stimà fin ussa, stuess ins examinar ulteriuras mesiras da protecziun. Questas mesiras ston esser commensuradas ed uschia efficacias. Sch'ils custs per mesiras supereschon la reducziun monetarisada annuala da las ristgas, na po ina mesira betg vegnir considerata sco efficazia areguard ils custs. Mesiras pussaivlas èn d'installar raits supplementaras pli grondas cunter crudadas da crappa, d'allontanar grip en la paraid-crap Scumandada, da segirar massas da grip instabilas en la paraid-crap e da survegliar la paraid-crap. Sin fundament da

las enconuschentschas actualas na pon ins er ni excluder ni garantir la construcziun d'ina gallaria da protecziun. En cumparegliaziun cun la construcziun d'ina gallaria pon ins realisar pli svelt las autras mesiras.

Tar la dumonda 2: Per la fracziun da Riein exista ina pussaivladad da sviament sur las aclas fin ad Ober Dutjen e Valendau. Quest sviament n'è betg charrabel durant l'enviern ed el è limità per il traffic pesant e per vehichels gronds. In transport da scolaras e scolars cun in bus pitschen è dentant pussaivel ordaifer il temp da la serrada d'enviern ed è er vegnì organisà uschia da la vischnanca dad Ilanz/Glion.

Il sviament ha ina lunghezza totala da 19 km e maina sur 6 km sin ina via communal d'in vial cun cuvrada dira, sin la quala igl è da princip pussaivel da cruchar cun vehichels. I n'existan naginas zonas da privel u passaschas difficilas. Ils ulteriurs 13 km dal sviament mainan sur las vias chantunalas da buna qualidad fin a Glion. Il temp da viadi per il traject da sviament importa 26 minutas cun in auto da persunas, quai che signifitga in temp da viadi supplementar da 16 minutas. Resumond na considerescha la Regenza il sviament durant il temp da manaschi ni sco inadattà ni sco privlus per il transport da scolaras e scolars.

Tar la dumonda 3: Da vart da la vischnanca dad Ilanz/Glion n'hai fin ussa dà naginas reclamaziuns concernent la comunicaziun. Curt suenter l'eveniment dals 17 d'avrigl 2024 è il servetsch da pichet da l'Uffizi da construcziun bassa stà al lieu per signalisar la zona da privel e per serrar il traject da via. La vischnanca dad Ilanz/Glion è vegnida infurmada immediatamain per telefon. L'Uffizi da construcziun bassa ha orientà di per di la vischnanca dad Ilanz/Glion davart la situaziun actuala ed ha envidà il col-lavuratur responsabel da la vischnanca per mintga discurs al lieu cun las persunas spezializadas ed ils geologs. L'infurmaziun da la populaziun locala è chausa da la vischnanca ed è vegnida fatga sur l'agen chanal d'infurmaziun communal per SMS «cas da catastrofa». Independentamain da quai publitgescha l'Uffizi da construcziun bassa la situaziun actuala da las vias ed eventualas infurmaziuns preliminaras sin la plattform d'infurmaziun strassen.gr.ch. Tut tenor la durada e las consequenzas d'in eveniment u sch'i n'exista nagina pussaivladad da signalisar in sviament en moda adequata, datti per regla supplementarmain ina comunicaziun a las medias.



En num da la Regenza

Il president:

Dr. Jon Domenic Parolini

Il cancellier:

Daniel Spadin